

ՀՀ կրթության, գիտության, մշակույթի և սպորտի նախարարի
2025 թվականի հոկտեմբերի 21-ի N 2479-Ն/հրամանի

ԸՆԹԱՑԱԿԱՐԳԵՐ

2025-2026 ուսումնական տարվա Հայաստանի Հանրապետության հանրակրթական ուսումնական հաստատությունների սովորողների հանրապետական առարկայական օլիմպիադաների (Մաթեմատիկա, Ֆիզիկա, Աստղագիտություն, Կենսաբանություն, Ինֆորմատիկա /«Թվային գրագիտություն և համակարգչային գիտություն»/, Քիմիա, Աշխարհագրություն, Մայրենի /ընթերցանություն/, Հայոց լեզու, Հայ գրականություն, Պատմություն, Անգլերեն, Գերմաներեն, Ռուսաց լեզու, Ֆրանսերեն, Նախնական զինվորական պատրաստություն /«Ֆիզիկական կրթություն և անվտանգ կենսագործունեություն»/) կազմակերպման, անցկացման և բողոքարկման

1. Սույն Ընթացակարգով կարգավորվում են 2025-2026 ուսումնական տարվա Հայաստանի Հանրապետության դպրոցականների առարկայական օլիմպիադաների /այսուհետ՝ Օլիմպիադա/ կազմակերպման, անցկացման և բողոքարկման հետ կապված հարաբերությունները:

2. Աշակերտների անվանական ցուցակների ձևանմուշները, առաջադրանքները, պատասխանները, արդյունքները և Օլիմպիադայի վերաբերյալ այլ տեղեկությունները տեղադրվում են www.olymp.am և lib.armedu.am կայքերում:

3. Օլիմպիադան կազմակերպվում է երեք փուլով՝ առաջին /դպրոցական/, երկրորդ /մարզային/ և երրորդ /հանրապետական/: 5-6-րդ դասարանների մայրենի և մաթեմատիկա առարկաների օլիմպիադաները անցկացվում են երկու փուլով՝ դպրոցական և մարզային:

4. Մայրենի (Ընթերցանություն) առարկայի օլիմպիադայի ստուգումն իրականացվում է ըստ ԿԳՄՍ նախարարության սահմանած ուղեցույցի, որը հասանելի կլինի www.olymp.am կայքում:

5. Օլիմպիադան անցկացվում է ըստ խմբերի.

Մաթեմատիկա- I խումբ՝ 5-րդ դաս., II խումբ՝ 6-րդ դաս., III խումբ՝ 7-րդ դաս., IV խումբ՝ 8-րդ դաս., V խումբ՝ 9-րդ դաս., VI խումբ՝ 10-րդ դաս., VII խումբ՝ 11-12-րդ դաս.,

Աստղագիտություն- I խումբ՝ 10-12-րդ դաս.,

Ինֆորմատիկա (Թվային գրագիտություն և համակարգչային գիտություն) -

I խումբ՝ 9-րդ դաս., II խումբ՝ 10-12-րդ դաս.,

Կենսաբանություն, Քիմիա, Աշխարհագրություն, Ռուսաց լեզու, Անգլերեն, Ֆրանսերեն, Գերմաներեն, Ֆիզիկա, Հայոց լեզու, Հայ գրականություն, Պատմություն, ՆՁՊ (Ֆիզիկական կրթություն և անվտանգ կենսագործունեություն) - I խումբ՝ 9-րդ դաս., II խումբ՝ 10-րդ դաս., III խումբ՝ 11-12-րդ դաս.,

Մայրենի (Ընթերցանություն) - I խումբ՝ 5-րդ դաս., II խումբ՝ 6-րդ դաս.:

6. Օլիմպիադայի երեք փուլերի առաջադրանքները՝ ըստ խմբերի, կազմում է հանրապետական առարկայական հանձնաժողովը: «Մաթեմատիկա», «Քիմիա», «Կենսաբանություն» և «ՆՁՊ» առարկաների օլիմպիադաների հանրապետական

հանձնաժողովները բաղկացած են 10–18 անդամից, իսկ մնացած բոլոր առարկաների օլիմպիադաների հանրապետական հանձնաժողովները՝ 4–8:

7. ՀՀ կրթության, գիտության, մշակույթի և սպորտի նախարարությունը առաջադրանքները տրամադրում է մարզային կրթության վարչություններին օլիմպիադաների անցկացման օրը՝ էլեկտրոնային տարբերակով:

8. «Ֆիզիկա», «Քիմիա», «Աշխարհագրություն» և «Կենսաբանություն» առարկաների երրորդ փուլերն անցկացվում են երկու օրվա ընթացքում՝ տեսական և գործնական փուլերով:

9. «Մաթեմատիկա» և «Ինֆորմատիկա» («Թվային գրագիտություն և համակարգչային գիտություն») առարկաների երրորդ փուլն անցկացվում է երկու օրվա ընթացքում՝ երկուսն էլ տեսական փուլով:

10. ՆՁՊ (Ֆիզիկական կրթություն և անվտանգ կենսագործունեություն) առարկայի առաջին և երկրորդ փուլերն անցկացվում են երկու օրվա ընթացքում՝ տեսական և գործնական փուլերով, իսկ երրորդ փուլն անցկացվում է երեք օրվա ընթացքում՝ նույնպես տեսական և գործնական փուլերով:

11. Օլիմպիադայի առաջին փուլն անցկացվում է դպրոցում:

12. Օլիմպիադան կազմակերպելու համար դպրոցի տնօրենի հրամանով ստեղծվում է հանձնաժողով, որի կազմում չեն կարող ընդգրկվել տվյալ առարկայի մասնագետներ:

13. Առաջին փուլին կարող է մասնակցել ցանկացած սովորող՝ այդ մասին տեղեկացնելով դպրոցի տնօրինությանը:

14. Հաստատության տնօրենը մինչև 2025թ. նոյեմբերի 5-ը ներառյալ Կրթության կառավարման տեղեկատվական համակարգի (այսուհետ՝ ԿԿՏՀ) համապատասխան բաժնում Օլիմպիադային մասնակցել ցանկացող սովորողի համար իրականացնում է նշում՝ ըստ առարկաների:

15" Սահմանված ժամկետի ավարտից հետո ԿԿՏՀ-ում ինքնաշխատ եղանակով ձևավորվում են մասնակիցների ցանկերը՝ ըստ առարկաների և ներկայացվում մինչև 2025թ. նոյեմբերի 7-ը ներառյալ ԿԳՄՄՆ՝ info@olymp.am հասցեին:

16" Առաջին փուլի մասնակիցների ցուցակը տեղադրվում է www.olymp.am և lib.armedu.am կայքերում:

17" Օլիմպիադայի բոլոր երեք փուլերն անցկացվում են՝ համաձայն ժամանակացույցի:

18" Օլիմպիադայի առաջին փուլի արդյունքները չեն բողոքարկվում:

19" Դպրոցի տնօրենը պատասխանների լրացված ձևաթղթերը երկու աշխատանքային օրվա ընթացքում հանձնում է մարզպետարան /Երևանի քաղաքապետարան/:

20" Մարզպետարանի կրթության, մշակույթի և սպորտի վարչությունը /Երևանի քաղաքապետարանի հանրակրթության վարչությունը դպրոցներից ստացված պատասխանների ձևաթղթերը հինգ աշխատանքային օրվա ընթացքում ներկայացնում է ՀՀ ԿԳՄՄՆ:

21" Պատասխանների ձևաթղթերը համակարգչային ծրագրի միջոցով մշակվում, ստուգվում և արդյունքները հրապարակվում են երկրորդ փուլի անցկացման օրվանից առնվազն մեկ շաբաթ առաջ:

22" Օլիմպիադայի երկրորդ փուլն անցկացվում է համաձայն ժամանակացույցի՝ մարզպետարանների /Երևանի քաղաքապետարանի/ կողմից սահմանված վայրում:

23" Երկրորդ փուլին մասնակցում են առաջին փուլում լավագույն արդյունքներ ցուցաբերած աշակերտները՝ հանրապետական առարկայական հանձնաժողովի որոշման համաձայն:

24" Օլիմպիադայի երկրորդ փուլի աշխատանքները ստուգում է մարզպետարանների /Երևանում քաղաքապետարանի/ կողմից ստեղծված առարկայական հանձնաժողովը:

25" Օլիմպիադայի երկրորդ փուլի աշխատանքների արդյունքների բողոքարկումը կատարվում է օլիմպիադայի անցկացման վայրում՝ օլիմպիադայի արդյունքները հրապարակելուց հետո հաջորդ աշխատանքային օրվա ընթացքում:

26" Երկրորդ փուլի հաղթողները պարգևատրվում են մարզպետարանների /Երևանում քաղաքապետարանի/ դիպլոմներով և գովասանագրերով:

27" Օլիմպիադայի երկրորդ փուլի մասնակիցների ցուցակները և ստացած միավորները (համաձայն ձևաչափի) մարզպետարանի կրթության, մշակույթի և սպորտի վարչությունը /Երևանի քաղաքապետարանի հանրակրթության վարչությունը/ երեք աշխատանքային օրվա ընթացքում ներկայացնում է ԿԳՄՄՆ՝ info@olymp.am էլեկտրոնային հասցեով:

28" Օլիմպիադայի երրորդ փուլն անցկացվում է համաձայն ժամանակացույցի՝ ԿԳՄՍ նախարարության կողմից սահմանված վայրում:

29" Երրորդ փուլին մասնակցում են երկրորդ փուլում լավագույն արդյունքներ ցուցաբերած մասնակիցները՝ հանրապետական առարկայական հանձնաժողովի որոշման համաձայն:

30" Օլիմպիադայի երրորդ փուլի աշխատանքների արդյունքների բողոքարկումը կատարվում է օլիմպիադայի անցկացման վայրում՝ օլիմպիադայի արդյունքները հրապարակելուց հետո հաջորդ աշխատանքային օրվա ընթացքում:

31" Երրորդ փուլի հաղթողները պարգևատրվում են ՀՀ ԿԳՄՍ նախարարության դիպլոմներով և գովասանագրերով:

32" **«Մաթեմատիկա», «Ֆիզիկա», «Աստղագիտություն», «Կենսաբանություն», «Ինֆորմատիկա» /«Թվային գրագիտություն և համակարգչային գիտություն»/, «Քիմիա», «Աշխարհագրություն»** առարկաների օլիմպիադաների երրորդ փուլի 10-12-րդ դասարանների դիպլոմակիրները համարվում են միջազգային օլիմպիադայի ՀՀ թիմի հավակնորդներ: